

四庫全書

集部

欽定四庫全書

劉賓客外集卷六

唐 劉禹錫 撰

詩

唐侍御寄遊道林嶽麓二寺詩并沈中丞姚

員外所和見徵繼作

湘西古剎雙蹲蹲羣峯朝拱如駿奔青松步障深五里
龍宮黯黯神為閭高殿呀然壓蒼嶽俯瞰長江疑欲吞
橘州泛浮金寶動水郭繚繞朱樓騫語餘百響入天籟

衆奇引步輕翻翻泉清石布博碁子蘿密鳥韻如簧言
回廊架險高且曲新徑穿林明復昏淺流忽濁山獸過
古木半空天火痕星使雙飛出禁垣元侯餞之遊石門
紫髯翼從紅袖舞竹風松雪香溫磨遠持青瑣照巫峽
一戛驚斷三聲猿靈山會中身不預吟想峭絕愁精魂
恨無黃金千萬餅布地買取為丘園

遙和韓睦州元相公二君子

玉人紫綬相輝映却要霜髯一兩莖其奈無成空老去

每臨明鏡若為情

張郎中籍遠寄長句開緘之日已及新秋因

舉目前仰酬高韻

南宮詞客寄新篇清似湘靈促柱絃京邑舊遊勞夢想
歷陽秋色正澄鮮雲銜日脚成山雨風駕潮頭入渚田
對此獨吟還獨酌知音不見思蒼然

酬湖州崔郎中見寄

風箏吟秋空不肖指爪聲高人靈府間律呂伴咸英昔

年與兄遊文似馬長卿今來寄新詩乃類陶淵明磨礬
老益智吟詠閒彌精豈非山水鄉蕩漾神機清渚烟蕙
蘭動溪雨虹蜺生馮君虛上舍待我乘興行

酬楊八庶子喜韓吳興與余同遷見贈

依本韻次

用

早遇聖明朝鴈行登九霄

吳興與余
中外兄弟

文輕傳武仲酒逼

蓋寬饒捨矢同瞻鵠當筵共賽臬

吳興與余同
年判八等第

琢磨三

益重唱和五音調臺栢烟長起池荷香暗飄

吳興與余
同為御臺

門外有
蓮池也

星文辭北極旗影度東遼

吳興自度支郎中出
為行軍司馬所從即

范僕射昔范明
友為度遼將軍

直道由來黜浮名豈敢要三湘與百越

雨散又雲遙遠守慙侯籍徵還荷詔條額容唯舌在別

恨幾魂銷滿眼悲陳事逢人少舊僚烟霞為老伴蒲柳

任先凋虎綬懸新印龍舡理去橈斷腸天北郡攜手洛

陽橋幢蓋今雖貴弓旌會見招其如草玄客空手久寥

寥

秋日書懷寄河南王尹

公府想無事西池秋水清去年為狎客永日奉高情況
有臺上月如聞雲外笙不知桑落酒今歲與誰傾

浙東元相公書歎梅雨鬱蒸之候因寄七言
嵇山自與岐山別何事連年驚鷺飛百辟商量舊相入
九天祇候老臣歸平湖晚泛窺清鏡高閣晨開掃翠微
今日看書最惆悵為聞梅雨損朝衣

酬嚴給事賀加五品兼簡同制水部李郎中
九天雨露傳青詔八舍郎官換綠衣初佩銀魚隨仗入

宜乘白馬退朝歸
彫盤賀喜開瑤席
綵筆題詩出瑣闥
聞道水曹偏得意
霞朝霧夕有光輝

裴相公大學士見示答張秘書謝馬詩并羣

公屬和因命追作

草玄門戶少塵埃
丞相并州送馬來
初自塞垣銜苜蓿
忽行幽徑破莓苔
尋花緩轡威遲去
帶酒垂鞭躑躅回
不與王侯與詞客
知輕富貴重清才

奉和司空裴相公中書即事通簡舊僚之作

談笑在巖廊人人盡所長儀形見山立文字動星光日
運丹青筆時看赤白囊佇聞戎馬息入賀領駕行

微之鎮武昌中路見寄藍橋懷舊之作悽然

繼和兼寄安平

今日油幢引他年黃紙追同為三楚客獨有九霄期宿
草恨長在傷禽飛尚遲武昌應已到新柳映紅旗

奉和裴侍中將赴漢南留別座上諸公

金貂曉出鳳池頭玉節前臨南雍州暫輟洪鑪觀劒戟

還將大筆注春秋管絃席上留高韻山水途中入勝遊
峴首風烟看未足便應重拜富民侯

和兵部鄭侍郎省中四松詩十韻

松是中書相公任侍

郎手栽

右相歷中臺移松武庫栽
然茸抽組綬青實長玫瑰
便有霄勢看成構厦材
數分天柱半影逐日輪回
舊賞台階去新知谷口來
息陰常仰望翫境幾徘徊
翠粒晴懸露蒼鱗雨起苔
凝音助瑤瑟飄葉泛金罍
月桂花遙

燭星榆半對開終須似雞樹榮茂近昭回

和蘇郎中尋豐安里舊居寄主客張郎中

漳濱卧起恣閒遊宣室徵還未白頭舊隱來尋通德里
新篇寫出畔牢愁池看科斗成文字鳥聽提壺憶獻酬
同學同年又同舍許君雲路並華輶

將赴蘇州途出洛陽留守李相公累申宴餞

寵行話舊形於篇章謹抒下情以申仰謝

歲杪風物動雪餘宮苑晴兔園賓客至金谷管絃聲洛

水故人別吳宮新燕迎越郎憂不淺懷袖有瓊英

吳興敬郎中見惠斑竹杖兼示一絕聊以謝

之

一莖炯炯琅玕色數節重重玳瑁文拄到高山未登處
青雲路上願逢君

和浙西王尚書聞常州楊給事製新樓因寄
之作

文昌星象盡東來油幕朱門次第開且上新樓看風景

會乘雲雨一時回

尚書在南宮為左丞給事與禹錫皆是郎吏

酬浙東李侍郎越州春晚即事長句

越中謁謁繁華地秦望峯前禹穴西湖草初生邊鴈去

山花半謝杜鵑啼青油畫捲臨高閣紅旆晴翻繞古堤

明日漢庭徵舊德老人爭出若耶溪

後漢劉寵為會稽太守及徵為將作

大匠山陰縣有五六老吏自若耶山谷間出人齎百錢以送寵寵勞之答曰自明府下車狗不夜吠民不見吏年老連值聖明今聞當見棄去故自扶奉送寵曰吾政何能及公言耶勤告父老為人選一大錢受之

酬淮南牛相公述舊見貽

少年曾忝漢庭臣
晚歲空餘老病身
初見相如成賦日
尋為丞相掃門人
追思往事咨嗟久
喜奉清光笑語頻
猶有登朝舊冠冕
待公三八拂埃塵

酬鄭州權舍人見寄十二韻

朱戶凌晨啟碧梧
含早涼人從桔槔
至書到漆沮傍杓
會因佳句情深取
斷章愜心同笑語
入耳勝笙簧憶昔

三條路居鄰數仞牆

舍人舊宅先福里時忝為東鄰

學堂青玉案綵服紮

羅囊麟角看成就
龍駒見抑揚
轂中飛一箭雲際落雙

鶴

舍人一舉登科
又判入等第

甸邑叨前列天臺媿後行

鄙人離渭
南主簿十

年舍人方尉其邑及罹譴謫重入南
宮禮部郎中舍人方任考功員外

鯉庭傳事業雞樹

遂翺翔書殿連鳴鵲神池接鳳凰追遊蒙尚齒惠好結

中腸

鄙人在集賢與西
掖接近日夕追遊

鍛翮方擡舉危根易損傷一麾

憐棄置五字借恩光

鄙人出牧姑
蘇舍人草制

汝海崆峒秀溱流芍

藥芳風行能偃草境靜不爭桑

鄙人轉臨汝
舍人牧滎陽

轉旆趨關

右頌條匝渭陽病吟猶有思老醉已無狂塵滿鴻溝道

沙驚白狄鄉佇聞黃紙詔促召紫微郎

奉和裴令公夜宴

天下蒼生望不休
東山雖有但時遊
從來海上仙桃樹
肯逐人間風露秋

洛濱病卧李侍郎見惠藥物謔以文星之句
隱几支頤對落暉
故人書信到柴扉
周南留滯商山老
星象如今屬少微

酬留守牛相公宮城早秋寓言見寄

曉月映宮樹
秋光起天津
涼風稍動葉
宿露未生塵
景

氣尚芳麗曠望感心神揮毫成逸韻開閣遲來賓擺去
將相印漸為逍遙身如招後房宴却要白頭人

牛相公留守見示城外新墅有溪竹秋月親
情多往宿遊恨不得去因成四韻兼簡洛
中親故之什兼命同作

別墅洛城外月明村墅通光輝滿地上絲管發舟中堤
豔菊花露島涼松葉風高情限清禁寒漏滴深宮

和僕射牛相公追感韋裴六相登庸皆四十

餘未五十薨歿豈早榮早枯之義今年將
六十猶粗強健因親故勸酒率然成篇并
見寄之作

坐鎮清朝獨殷然間徵故事數前賢用才同踐鈞衡地
稟氣終分大小年威鳳本池思泛泳仙查舊路望回旋
猶憐綺季深山裏唯有松風與石田

和僕射牛相公以離闕庭七年班行親故亡
歿十無一人再覩龍顏喜慶雖極感歎風

燭能不愴然因成四韻并示集賢中書二

相公所和

久辭龍闕擁紅旗喜見天顏拜赤墀三省英寮非舊侶
萬年芳樹長新枝交朋接武居仙院幕客追風入鳳池
雲母屏風即施設可憐榮耀冠當時

和僕射牛相公見示長句

靜得天和興自濃不緣官達性靈慵大鵬六月有閒意
仙鶴千年無躁容流輩盡來多歎息官班高後少過從

唯應加築露臺上
賸見終南雲外峯

和牛相公雨後寓懷見示

金火交爭正抑揚
蕭蕭飛雨助清商
曉看紈扇恩情薄
夜覺紗燈刻數長
樹上早蟬纔發響
庭中百草已無光
當年富貴亦惆悵
何況悲翁髮似霜

牛相公林亭雨後偶成

飛雨過池閣
浮先生草樹
新竹開粉奩
初蓮藝香注
野花無時節
水鳥自來去
若問知境人
人間第一處

和牛相公題姑蘇所寄太湖石兼寄李蘇州

震澤生奇石沉潜得地靈
初辭水府出猶帶龍宮腥
發自江湖國來榮卿相庭
從風夏雲勢上漢古查形
拂拭魚鱗見鏗鏘玉韻聆
烟波含宿潤苔蘚助新青
嵌穴波斯貌纖鉅蟲篆銘
孱顏傲林薄飛動向雷霆
煩熱近還散餘醒見便醒
凡禽不敢息浮塹莫能停
靜稱垂松蓋鮮宜映鶴翎
忘憂常目擊素尚與心冥
眇小欺湘燕團圓笑落星
徒然想融結安可測年
齡採取詢鄉耆搜求

按舊經垂鈎入空隙隔浪動晶熒有獲人爭賀歡謠衆
共聽一州驚閱寶千里遠揚舲覩物洛陽陌懷人吳御
亭寄言垂天翼早晚起滄溟

和陳許王尚書酬白少傅侍郎長句因通簡
汝洛舊遊之什

寥廓高翔不可追風雲失路暫相隨方同洛下書生詠
又見軍前大將旗雪裏命賓開玉帳飲中請號駐金卮
竹林一日王戎去嵇阮雖貧興未衰

和僕射牛相公寓言二首

兩度竿頭立定誇
回眸舉袖拂青霞
盡拋今日貴人樣
復振前朝名相家
御史定來休直宿
尚書依舊趁參衙
具瞻尊重誠無敵
猶憶洛陽千樹花

心如止水鑒常明
見盡人間萬物情
鵬鶚騰空猶逞俊
驂騑齒足自無驚
時來未覺權為祟
貴了方知退是榮
只恐重重世緣在
事須三度副蒼生

和牛相公南溪醉歌見寄

脫屣將相守冲謙唯於山水獨不廉枕伊背洛得勝地

鳴臯少室來軒簷相

去聲

形面勢默指畫言下變化隨顧

瞻清池曲榭人所致野趣幽芳天與添有時轉入潭島

間珍木如幄藤為簾忽然便有江湖思沙磔平淺草纖

纖怪石釣出太湖底珠樹移自天台尖崇蘭迎風綠泛

艷圻蓮含露紅襍檐修廊架空遠岫入弱柳覆檻流波

霑渚蒲抽莢劒脊動岸荻迸笋錐頭鉅攜觴命侶極永

日此會雖數心無厭人皆置莊身不到富貴難與逍遙

兼唯公出處得自在決就放曠辭炎炎座賓盡歡恣談
諠愧我掉頭還奮髯能令商於多病客亦覺自適非沉
潛

酬僕射牛相公晉國池上別後至甘棠館忽
夢同遊因成口號見寄

已嗟池上別魂驚忽報夢中攜手行此夜獨歸還乞夢
老人無睡到天明

裴侍郎大尹雪中遺酒一壺兼示喜眼疾平

一絕有閒行把酒之句斐然仰酬

卷盡輕雲月更明
金篦不用且閒行
若傾家釀招來客
何必池塘春草生

訓太原狄尚書見寄

家聲烜赫冠前賢
時望穹崇鎮北邊
身上官銜如座主
幕中談笑取同年
幽并俠少趨鞭弭
燕趙佳人奉管絃
仍把天兵書號筆
遠題長句寄山川

訓宣州崔大夫見寄

白衣曾拜漢尚書今日恩光到敝廬再入龍樓稱綺季
應緣狗監說相如中郎南鎮權方重內史高齋興有餘
遙想敬亭春欲暮百花飛盡柳花初

訓皇甫十少尹暮秋久雨喜晴有懷見示

雨餘獨坐卷簾帷便得詩人喜霽詩搖落從來長年感
慘舒偏是病身知掃開雲霧呈光景流盡潢汙見路岐
何況菊香新酒熟神州司馬好狂時

劉賓客外集卷六

欽定四庫全書

集部

劉賓客外集卷七至十

詳校官監察御史

臣邱文愷

檢討臣何思鈞覆勘

總校官進士

臣繆

琪

校對官主事

臣龔敬身

謄錄監生

臣畢所諱

欽定四庫全書

劉賓客外集卷七

唐 劉禹錫 撰

詩

和浙西李大夫霜夜對月聽小童吹觱篥歌

依本韻

海門雙青暮烟歇萬頃金波湧明月侯家小兒能觱篥
對此清光天性發長江凝練樹無風瀏慄一聲霄漢中
涵胡畫角怨邊草蕭瑟清蟬吟野叢沖融頓挫心使指

雄吼如風轉如水思婦多情珠淚垂仙禽欲舞雙翅起
郡人寂聽衣滿霜江城月斜樓影長纔驚指下繁韻息
已見樹杪明星光謝公高齋吟激楚戀闕心同在羈旅
一秦荆人白雪歌如聞雒客扶風鵠吳門水驛接山陰
文字殷勤寄意深欲識陽陶能絕處少年榮貴道傷心
浙西李大夫述夢四十韻并浙東元相公訓
和斐然繼聲

位是才能取時因際會遭羽儀呈鸞鷟銛刃試豪曹洛

下推年少山東許地高門承金鉉鼎家有玉璫韜

呂仍
嗣侯

海浪扶鵬翅天風引驥髦便知蓬閣閔不識魯衣褒興
發春塘草魂交益部刀形開猶抱膝燭盡遽揮毫昔仕
當初筮逢時詠載橐懷鉉辨蟲蠹染素學鵝毛車騎方
休汝歸來欲效陶

大夫罷太原
從事歸京師

南臺資謇諤內署選風

騷羽化如乘鯉樓居舊冠黿美香焚濕麝名菓賜乾荀
議赦蠅棲筆邀歌蟻泛醪代言無所戲謝表自稱叨蘭
焰凝芳澤芝泥瑩玉膏對頻聲價出直久夢魂勞草詔

欽定四庫全書

卷七

令歸馬批章答獻葵

幽冀歸闕兩戎乞盟事並具注前

銀花懸院榜翠

羽映簾條諷諫欣然納奇觚率爾操禁中時諤諤天下

免忉忉右顧龜成印雙飛鵠織袍謝賓緣地密潔已是

心豪五日思歸沐三春羨衆邀茶爐依綠筍碁局就紅

桃溟海桑潛變陰陽炭暗熬仙成脫屣去臣戀捧弓號

建節辭烏栢宣風看鷺濤土山京口峻鐵甕郡城牢

舊說

潤州城如鐵甕事見歸浣南征記

曲島花千樹官池水一篙鶯來和絲

管鴈起拂麾旄宛轉傾羅扇回旋墮玉搔罰籌長豎森

觥盞樣如舫山是千重嶂江為四面濠卧龍曾得雨

浙東

孤鶴尚鳴臯

浙西

劍用雄開匣

二公

弓閒蟄受弦

自謂

鳳姿嘗

在竹

二公

鸚羽不離蒿

自謂

吳越分雙鎮東西接萬艘今朝

叱潘陸江海更滔滔

和浙西李大夫晚下北固山喜徑松成陰悵

然懷古偶題臨江亭并浙東元相公所和

依本韻

一辭溫室樹幾見武昌柳荀謝年何少韋平望已久種

松夾石道紆組臨沙阜目覽帝王州心存股肱守葉動
驚綵翰波澄見頰首晉宋齊梁都千山萬江口烟散隋
宮出濤來海門吼風俗太伯餘衣冠永嘉後江長天作
限山固壤無朽自古稱佳麗非賢誰奄有八元邦族盛
萬石門風厚天柱揭東溟文星照北斗高亭一騁望舉
酒共為壽因賦詠懷詩遠寄同心友禁中晨夜直江左
東西偶筆手握兵符儒腰盤貴綬頒條風有自立事言
無苟農野聞讓耕軍人不使酒用材當構厦知道寧窺

牖誰為青雲高鵬飛終背負

和浙西李大夫伊川卜居

早入八元數嘗承三接恩飛鳴天上路鎮壓海西門清
望寰中許高情物外存時來誠不讓歸去每形言洛下
思招隱江干厭作藩按經修道具依樣買山村

馬葛堂
為御史

大夫將置宅命畫工圖其
狀戒所使曰依此樣求之開鑿隨人化幽陰為律暄遠

移難得樹立變舊荒園絕塞通潛徑平泉占上原烟霞
遙在想簿領益為繁丹禁虛東閣蒼生望北轅徒令雙

白鶴五里自翩翾

和滑州李尚書上已憶江南禊事

白馬津頭春日遲沙州歸鴈拂旌旗
柳營唯有軍中戲不似江南三月時

酬滑州李尚書秋日見寄

一入石渠署三聞宮樹蟬丹霄未得路
白髮又添年雙節外臺貴洞簫中禁傳
徵黃在旦夕早晚發南燕

吐綬鳥詞

并序

滑州牧尚書李公以吐綬鳥詞見示兼命繼聲蓋尚書
前為御史時所作有翰林二學士同賦之今所謂追和
也鳥之所異具于首篇

越山有鳥翔寥廓
嚟中天綬光若若
越人偶見而奇之
因名吐綬江南知
四明天姥神仙地
朱鳥星精鍾異氣
赤玉彫成彪炳毛
紅綃剪出玲瓏翅
湖烟始開山日高
迎風吐綬盤花條
臨波似染瑯琊草
映葉疑開阿母桃
花紅草綠人間事
未若靈禽自然貴
鶴吐明珠暫報恩

鵲銜金印空為瑞春和秋霽野花開翫景尋芳處處來
翠幕雕籠非所慕珠九柘彈莫相猜棲月啼烟凌縹緲
高林先見金霞曉三山仙路寄遙情刷羽揚翹欲上征
不學碧雞依井絡願隨青鳥向層城太液池中有黃鵠
憐君長向高枝宿如何一借羊角風來聽簫韶九成曲

和西川李尚書漢州微月遊房太尉西湖

木落漢川夜西湖懸玉鉤旌旗環水次舟楫泛中流目
極想前事神交如共遊瑤琴久已絕松韻自悲秋

和重題

林端落照盡湖上遠嵐清水榭芝蘭室仙舟魚鳥情人
琴久寂寞烟月若平生一泛釣璜處再吟鏘玉聲

和遊房公舊竹亭聞琴絕句

尚有竹間路永無綦下塵一聞流水曲重憶食霞人

西州李尚書知愚與元武昌有舊遠示二篇

吟之泣然因以繼和二首

來詩云元公今
陳從事求蜀琴

將以為寄而武昌之
計聞因陳生會葬

如何贈琴日已是絕絃時無復雙金報空餘掛劍悲
寶匣從此閒朱絃誰復調祇應隨玉樹同向土中銷

和西川李尚書傷韋令孔雀及薛濤之什

玉兒已遂金環塋翠羽先隨秋草萎唯見芙蓉含曉露
數行紅淚滴清池

後魏元樹南陽王禧之子南奔到建業數年後北歸愛姬朱玉兒脫金指

環為贈樹至魏却以指環寄玉兒示有還意

酬李相公喜歸鄉國自鞏縣夜泛洛水見寄

鞏樹烟月上清光含碧流且無三已色猶泛五湖舟鵬

息風還起鳳歸林正秋雖攀小山桂此地不淹留

和李相公平泉潭上喜見初月

家山見初月林壑悄無塵幽境此何夕清光如為人潭
空破鏡入風動翠蛾嚙會向瑣窓望追思伊洛濱

和李相公初歸平泉過龍門南嶺遙望山居

即事

暫別明庭去初隨優詔還曾為鵬鳥賦喜過鑿龍山新
墅烟火起野程泉石間巖廊人望在只得片時閒

和李公以平泉新墅獲方外之名因為詩以
報洛中士君子兼見寄之什

業繼韋平後家依崑閭間思華辭北第蕭洒愛東山
滿室圖書在入門松菊閒華天雖暫息一舉出人寰

訓柳柳州家雞之贈

日日臨池弄小雛還思寫論付官奴
柳家新樣元和脚且盡薑牙劒手徒

答前篇

小兒弄筆不能噉浣壁書窓且當勤聞彼夢熊猶未兆
女中誰是衛夫人

答後篇

昔日傭工記姓名遠勞辛苦寫西京近來漸有臨池興
為報元常欲抗行

再授連州至衡陽酬柳柳州贈別

去國十年同赴召渡湘千里又分歧重臨事異黃丞相
三黜名慙柳士師歸目併隨回鴈盡愁腸正遇斷猿時

桂江東過連山下相望長吟有所思

重別

二十年來萬事同今朝岐路忽西東
皇恩若許歸田去歲晚當為鄰舍翁

三贈

信書誠自誤經事漸知非今日臨湘別何年休汝歸

題淳于髡墓

生為齊贅壻死作楚先賢應以客卿葬故臨官道邊寓

言本多興放意能合權我有一石酒置君墳樹前

懷妓四首

玉釵重合兩無緣魚在深潭鶴在天得意鸞休舞鏡
能言青鳥罷銜牋金盆已覆難收水玉軫長拖不續絃
若向靡蕪山下過遙將紅淚洒窮泉

鸞飛遠樹栖何處鳳得新巢已去心紅壁尚留香漠漠
碧雲初斷信沉沉情知點污投泥玉猶自經營買笑金
從此山頭似人石丈夫形狀淚痕深

但曾行處遍尋看雖是生離死一般買笑樹邊花已老
畫眉牕下月猶殘雲巖巫峽音容斷路隔星橋過往難
莫怪詩成無淚滴盡傾東海也須乾

三山不見海沉沉豈有仙蹤更可尋青鳥去時雲路斷
姮娥歸處月宮深紗窓遙想春相憶書幌誰憐夜獨吟
料得夜來天上鏡只應偏照兩人心

登清暉樓

潯陽江色朝添滿彭蠡秋聲鴈送來南望廬山千萬仞

共誇新出棟梁材

省試風光草際浮

熙熙春景霽草綠春光麗的歷亂相鮮歲蕤互虧蔽乍
疑芊綿裏稍動丰茸際影碎翻崇蘭浮香轉叢蕙含烟
絢碧綵帶露如珠綴幸因採掇日況此臨芳歲

赴和州於武昌縣再遇毛仙翁十八兄因成
一絕

武昌山下蜀江東重向仙舟見葛洪又得案前親禮拜

大羅天訣玉函封

劉賓客外集卷七

欽定四庫全書

劉賓客外集卷八

唐 劉禹錫 撰

詩

寄毗陵楊給事三首

揮毫起制來東省
躡足修名謁外臺
好看橐鞬莫惆悵
出文入武是全才

曾主魚書輕刺史
今朝自請左魚來
青雲直上無多地
却要斜飛取勢回

東城南陌昔同遊，坐上無人第二流。
屈指如今已零落，且須歡喜作鄰州。

巫山神女廟

巫山十二鬱蒼蒼，片石亭亭號女郎。
曉霧乍開疑卷幔，山花欲謝似殘粧。
星河好夜聞清珮，雲雨歸時帶異香。
何事神仙九天上，人間來就楚襄王。

柳絮

飄颻南陌起東鄰，漠漠濛濛暗度春。
花巷暖隨輕舞蝶，

玉樓晴拂豔粧人
縈迴謝女題詩筆
點綴陶公漉酒巾
何處好風偏似雪
隋河隄上古江津

陪崔大尚書及諸閣老宴杏園

更將何面上春臺
百事無成老又催
唯有落花無俗態
不嫌憔悴滿頭來

曹剛

大絃嘈囋小絃清
噴雪含風意思生
一聽曹剛彈薄媚
人生不合出京城

發蘇州後登虎丘寺望梅樓

獨宿望梅樓夜深珍木冷僧房已閉戶山月方出嶺碧池涵劍彩寶剎搖星影却憶郡齋中虛眠此時景

別蘇州二首

三載為吳郡臨期祖帳開雖非謝桀黠且為一裘裒流水閭門外秋風吹柳條從來送客處今日自魂銷

松江送處州奚使君

吳越古今路滄波朝夕流從來別離地能使管絃愁江

草帶烟暮海雲含雨秋知君五陵客不樂石門遊

題報恩寺

雲外支硎寺名聲敵虎丘石文留馬跡峯勢聳牛頭泉
眼潛通海松門預帶秋遲回好風景王謝昔曾遊

罷郡姑蘇北歸渡揚子津

幾歲悲南國今朝賦北征歸心渡江勇病體得秋輕海
濶石門小城高粉堞明金山舊遊寺過岸聽鐘聲

館娃宮在舊郡西南硯石山上前瞰姑蘇臺

傍有采香徑梁天監中置佛寺曰靈岳即
故宮也信為絕境因賦二章

宮館貯嬌娃當時意大誇艷傾吳國盡笑入楚王家月
殿移椒壁天花代舜華唯餘采香徑一帶入山斜

姑蘇臺

故國荒臺在前臨震澤波綺羅隨世盡麋鹿古時多築
用金鉅力摧因石鼠窠昔年雕輦路唯有采樵歌

贈同年陳長史員外

明州長史外臺郎憶昔同年翰墨場一自分襟多歲月
相逢滿眼是淒涼推賢有愧韓安國論舊唯存盛孝章
所歎謬遊東閣下看君無計出恓惶

寄湖州韓中丞

老郎日日憂蒼鬢遠守年年厭白蘋終日相思不相見
長頭相見是何人

有感

死且不自覺其餘安可論昨宵鳳池客今日雀羅門騎

更塵未息銘旌風已翻平生紅粉愛惟解哭黃昏

楊柳枝

揚子江頭烟景迷隋家宮樹拂金堤
嗟峨猶是當時色
半蘸波中水鳥棲

海陽十咏 并引

元次山始作海陽湖後之人或立亭榭率無指名及余
而大備每疏鑿構置必揣稱以標之人咸曰有旨異日
遷官裴侍郎為十咏以示余頗明麗而不虛美因掇拾

裴詩所未道者從而和之

一云余為吏隱亭迷言海陽之所從來詳美異日下與此

同

吏隱亭

結構得奇勢朱門交碧潯外來始一望寫盡平生心日
軒漾波影月砌鏤松陰幾度欲歸去回眸情更深

切雲亭

迥破林烟出俯窺石潭空被搖杏梁日松韻碧窓風隔
水生別島帶橋如斷虹九疑南面事盡入寸眸中

雲英潭

芳幄覆雲屏石廬開碧鏡
支流日飛洒深處身疑瑩
潛去不見迹清音常滿聽
有時病朝醒來此心神醒

玄覽亭

瀟灑青林際黃綠碧潭隈
淙流冒石下輕波逐砌回
香風逼人度幽花覆水開
故令無四壁晴夜月光來

裴溪

時御史已
過新恩

楚客憶關中疏溪想汾水
縈紆非一曲意態如千里
倒

影羅文動微波笑顏起君今賜環歸何人承玉趾

飛練瀑

晶晶擲巖端潔光如可把瓊枝曲不折雪片晴猶下石
堅激清響葉動承餘洒前時明月中見是銀河瀉

蒙池

滌滄幽壁下深淨如無力風起不成文月來同一色地
靈草木瘦人遠烟霞逼往往疑列仙園碁在巖側

焚絲瀑

飛流透嵌隙噴洒如絲棼含暈迎初旭翻光破夕曛餘
波遶石去碎響隔溪聞却望瓊沙際逶迤見脈分

雙溪

流水遶雙島碧溪相並深浮花擁曲處遠影落中心間
鷺久獨立曝龜驚復沉蘋風有時起滿谷簫韶音

月窟

潏潏漱幽石注入團圓處有如常滿杯承彼清夜露巖
曲月斜照林寒春晚煦遊人不敢觸恐有蛟龍護

送周魯儒赴舉詩

并引

晝居外次晨門曰有九疑生持一刺來謁立西階以須
生危冠方袂淺拱舒拜且前致辭稱贊其文頗涉獵前
言居五六日復裹來益引古事以相劇切與之言能言
其得姓因家之所自暨縣道鄉亭之風俗望水名山之
槩狀羅含所未記朱贛之未條咸得之於生由是始列
於賓籍臨觴而司斟觀博而竄言有日矣初邑中人聞
有生來而二千石客之駢然來觀遷客裴御史遇生於

坐抵掌曰人固有貌類而族殊者周生疑羅玠也衆咸
驟然而熟視生疑也愈甚夫形似古所有也優孟似叔
敖而楚君欲以為相人殊而貌肖猶或欲用之玠生於
衡山而生生於九疑其似誠匹也無乃躡其武昇俊造
仕甸服佐君藩為御史乎古文人無避事即有而書之
尚實也行李之貺則徵夫詩曰

宋日營陽內史孫因家占得九疑村童心便有愛書癖
手指今餘把筆痕自握蛇珠辭白屋欲憑雞卜謁金門

若逢廣坐問羊酪從此知名在一言

送曹璩歸越中舊隱詩并引

余為連州諸生以進士書刺者浩不可紀獨曹生崖然
自稱為山夫及與語以徵其實則曰所嗜者名嘗遠遊
以索之抗喉舌肱胝晦以干東諸侯見之日率莞然曰
秀才者天下是不禮庸何傷今方依名山以揚其聲將
掛幘於南嶽生之言未及休余遽曰在已不在山若子
之言依山而為高是鍊神叩寂捐日月而不顧名聞而

老至持是焉用生聞言愀然如晦色見於眉睫因留止
道士院從余求書以觀居三時而功陪一時讀史書自
皇帝至吳魏間班班能言之然而絕口不敢言衡山知
山夫不販而贏也十一月告余歸隱於會稽且曰知求
名之自矣乞詞以發之遂賦七言詩以鑒其志詩曰
行盡瀟湘萬里餘少逢知己憶吾廬數間茅屋閒臨水
一盞秋燈夜讀書地遠何當隨計吏策成終自詣公車
剡中若問連州事唯有千山畫不如

尋汪道士不遇

仙子東南秀泠然善馭風笙歌五雲裏天地一壺中受
錄金華洞焚香玉帶宮我來君閉戶應是向崆峒

八月十五日夜桃源翫月

塵中見月心亦閒況是清秋仙府間凝光悠悠寒露墜
此時云在最高山碧虛無雲風不起山上長松山下水
羣動脩然一顧中天高地平千萬里少君引我昇玉壇
禮空遙請真仙官雲駢欲下星斗動天樂一聲肌骨寒

金霞昕昕漸東上輪敲影促猶頻望絕景良時難再并
他年此日應惆悵

叔父元和中故昔時為桃源行後貶官武陵復為翫
月作並題於觀壁爾來暑紀再周既牽故此郡迎見
文字闕缺伏慮他年轉將塵沒故鵲在貞石以期不
朽太和四年既謹記

罷和州遊建康

秋水清無力寒山暮多思官閒不計程徧上南朝寺

田順郎歌

清歌不是世間音
玉殿嘗聞稱主心
唯有順郎全學得
一聲飛出九重深

米嘉榮

一別嘉榮三十載
忽聞舊曲尚依然
如今世俗輕前輩
好染髭鬚事少年

自江陵汭流道中

三千三百西江水
自古如今要路津
月夜歌謠有漁父

風天氣色屬商人沙村好處多逢寺山葉紅時覺勝春
行到南朝征戰地古來名將盡為神

別夔州官舍

三年楚國巴城守一去揚州揚子津青帳聯延喧驛步
白頭俯偃到江濱巫山暮色常含雨峽水秋來不恐人
惟有九歌詞數首里中留與賽蠻神

夜聞商人船中箏

大舩高船一百尺新聲促柱十三絃揚州市裏商人女

來占江西明月天

聞道士彈思歸引

仙公一奏思歸引
逐客初聞自泣然
莫怪殷勤悲此曲
越聲長苦已三年

喜康將軍見訪

謫居愁寂似幽棲
百草當門茅舍低
夜獵將軍忽相訪
鴈鴟驚起繞籬啼

贈劉景樵第

湘中才子是劉郎望在長沙住桂陽昨日鴻都新上第
五陵年少讓清光

赴連山途次德宗山陵寄張員外

常時並冕奉天顏委珮低簪彩仗間今日獨來張樂地
萬重雲水望橋山

嘗茶

生拍芳叢鷹觜牙老郎封寄謫仙家今宵更有湘江月
照出霏霏滿盃花

梁國詞

梁國三郎威德尊
女巫簫鼓走鄉村
萬家長見空山上
雨氣蒼茫生廟門

九日登高

世路山河險
君門烟霧深
年年上高處
未省不傷心

謝柳子厚寄疊石硯

常時同硯席
寄此感離羣
清越敲寒玉
參差疊碧雲
烟嵐餘斐疊
水墨雨氛氲
好與陶貞白
松窓寫紫文

元日感懷

振蟄春潛至湘南人未歸身加一日長心覺去年非燎
火委虛燼兒童銜彩衣異鄉無舊識車馬到門稀

謝宣州崔相公賜馬

浮雲金絡膝昨日別朱輪銜草如懷戀嘶風尚意頻曾
將比君子不是換佳人從此西歸路應容躡後塵

南中書來

君書問風俗此地接炎州淫祀多青鬼居人少白頭旅

情偏在夜鄉思豈唯秋每羨朝宗水門前盡日流

題招隱寺

隱士遺塵在高僧精舍開地形臨渚斷江勢觸山迴楚
野花多思南禽聲例哀殷勤最高頂閒却望鄉來

思歸寄山中友人

蕭條對秋色相憶在雲泉木落病身死潮平歸思懸涼
鐘山頂寺暝火渡頭船此地非吾土閒留又一年

望洞庭

湖光秋月兩相和潭面無風鏡未磨遙望洞庭山水翠
白雲盤裏一青螺

魚復江中

扁舟盡室貧相逐白髮藏冠鑷更加遠水自澄終日綠
晴林長落過春花客情浩蕩逢鄉語詩意留連重物華
風檣好住貪程去斜日青帘背酒家

歷陽書事七十韻

并引

長慶四年八月余自夔州轉歷陽浮岷山觀洞庭歷夏

口涉潯陽而東友人崔敦詩罷丞相鎮宛陵緘書來招
曰必我覲而之藩不十日飲不置子故余自池州道宛
陵如其素敦詩出祖於敬亭祠下由姑孰西渡江乃吾
圉也至則考圖經參見事為之詩俟采之夜諷者

一夕為湖地千年列郡名霸王迷路處亞父所封城漢
置東南尉梁分肘腋兵本吳風俗剽兼楚語音僮沸井

今無湧烏江舊有名土臺遊柱史石室隱彭鏗

老君適楚有臺

在馬彭鏗石室在含山縣

曹操祠猶在濡須塢未平海潮隨月大江

水應春生一昨深山裏終朝看火耕魚書來北關鷓首
下南荆雲雨巫山暗蕙蘭湘水清章華樹已失鄂渚草
來迎廬阜香爐出湓城粉堞明鴈飛彭蠡莫鷓噪大雷晴
平野分風使恬和趁夜程貴池登陸峻春穀渡橋鳴駱
驛主人問悲歡故舊情幾年方一面卜晝便三更助喜
杯盤盛忘機笑語旬管清疑警鶴絃巧似嬌鶯熾炭烘
蹲獸華茵織鬪鯨回裾飄霧雨急節墮瓊英斂黛疑愁
色施鈿耀翠晶容華本南國粧梳學西京日落方收鼓

天寒更炙笙促筵交履烏痛飲倒簪纓謔浪容優孟嬌
憐許智瓊蔽明添翠帶命燭柱金莖坐久羅衣皺盃傾
爲面驛興來從請曲意墮即飛觥令急重須改歡馮醉
盃呈詰朝還選勝來日又尋盟道別殷勤惜邀筵次第
爭唯聞嗟短景不復有餘醒衆散扃朱戶相攜話素誠
晤言猶疊疊殘漏自丁丁出祖千夫擁行厨五熟烹離
亭臨野水別思入哀箏接境人情洽方冬饌具精中
流爲界道隔岸數飛甍沙浦王渾鎮滄州謝眺城望

夫人化石夢帝日環營半渡趨津吏緣堤簇郡毗場黃
堆晚稻籬碧見冬菁里社爭來獻壺漿各自擎鵝夷傾
底烏粒穀闔成闕采石風傳析新林暮擊鉦蘭綸牽撥
刺犀焰照澄泓露冕觀原野前驅抗旆旌分庭展賓主
望闕拜恩榮比屋惇嫠輩連年水旱并遐思常後已下
令必先庚遠岫低屏列支流曲帶紫湖魚香勝肉官酒
重於錫憶惜泉源變斯須地軸傾雞籠為石顙龜眼入
泥坑事繫人風重官從物論輕江春俄澹蕩樓月幾虧

盈柳長千絲宛田塍一線耕遊魚將婢從野雉見媒驚
波淨攢鳬鵲洲香發杜蘅一鐘菰葑米千里水葵羹受
譴時方久分憂政未成叱瓊雖碌碌於鐵尚錚錚早忝
登三署曾聞奏六英無能甘負弩不慎在提衡口語成
中遘毛衣阻上征時聞關利鈍智亦有聲盲昔媿山東
妙今慙海內兄後來登甲乙早已在蓬瀛心托秦明鏡
才非楚白珩齒衰親藥物官薄傲公卿捧日皆元老宣
風盡大彭好令朝集使結束赴新正

劉賓客外集卷八

欽定四庫全書

劉賓客外集卷九

唐 劉禹錫 撰

雜著

為淮南杜相公論西戎表

臣某言臣一辭闕庭已僅二載官當重任身受重恩既懷子牟戀闕之心又負臧文竊位之責思所以歌頌聖德裨補箴規塵露至微不任懇迫臣遠祖詩顯名漢代出牧南陽讜言善策隨事獻納忠醇之至聞于中外遺

風可襲有激愚衷臣是以輒竭聞見粗陳梗槩雖不盡
陛下聖明萬分之一然臣子之心有直必獻伏惟皇帝
陛下德合天地道躋文武弛張普博事法陰陽氣均生
成人霑亭育凡是氛沴覆以春和銷除容納皆如聖意
寬宥肆赦實賴皇明河中誅鋤不勞兵革淮右底定不
戮一人慶浹萬邦事出千古近又西戎背約寇犯王師
陛下寬貸豺狼矜其兇悍布以恩澤果爾知慙功因德
成不以兵制故詩云獫狁孔熾書稱蠻夷猾夏臣觀自

古帝王不忍小忿貽大患故竭耗中國盡力邊陲至如
滅昆明之城平大宛之種豈是發輝皇猷增榮簡冊故
聖哲之論薄衛霍之功陛下鏡歷代無益之端修大君
文德之教遂得北狄深歲五城晏閑百蠻嚮化四海無
虞惟此小番尚迷聲教陛下示之大信加以舊恩雖關
防暫驚而烽燧旋罷臣負恩方鎮初懼寇戎正於憂迫
之時果聞仁聖之諭懷却兇孽不勞干戈臣靜思遠圖
久計莫若存信施惠以愧其心歲通玉帛待以客禮昭

宣聖德擇奉誼之臣恢拓皇威選謹邊之將積粟塞下
坐甲關中以逸待勞以高御下重其金玉之贈結以舅
甥之歡小來則慰安大至則嚴備明其斥候不撓不侵
則戎狄為可封之人沙場無戰死之骨若天下無事人
安歲稔然後訓兵命將破虜摧衡原州營田靈武盡復
舊地通使安西國家長筭悉在於此計熟事定舉必有
功苟未可圖宜宜容易此皆陛下朝夕倦談之事前後
立驗之謀臣質性頑疎籌畫庸近受恩非據敢忘獻忠

犬馬之心實所罄盡謹遣某官某奉表

謝上連州刺史表

臣某言伏奉去三月七日制授臣使持節連州刺史恭
承睿旨跪奉詔書皇恩重於丘山聖恩深於雨露抃舞
失次神魂再揚臣某中謝臣性愚拙謬學文詞幸遇休
明累登科第出身入仕並不因人德宗臨御之時臣忝
御史陛下龍飛之日臣忝郎官恭守章程勤修職業權
臣奏用蓋聞虛名實非曲求可以覆視跡卑易枉無路

自明亦緣臣有微才所以嫉臣者衆競生口語廣肆加
誣伏賴陛下至仁時從寬典舉以緣坐貶佐遐藩屢變
星霜頻經恩赦犬馬懷戀寢興匪寧唯讀佛經願延聖
壽昨蒙昭命追赴上都隨列授官俾居遠郡在臣之分
榮幸已多伏荷陛下孝理純深皇明照燭哀臣老母羸
疾憫臣一身零丁特降所恩得移善部光榮廣被母子
再生凡在人臣皆感聖德凡為人子皆荷聖慈豈唯賤
臣獨受恩造不覺喜極至于涕零昔殷王俯念於前禽

且聞解網漢帝有感於少女爰命罷刑方之聖朝不足
多尚感召和氣慰安羣生非臣隕越所能上報伏以南
方厲疾多在夏中臣自發柳州便染瘴瘧扶策在道不
敢停留即以今月十一日到州上訖謹宣聖旨以示遠
人恭述詔條所期富庶無任

含輝洞述

河東薛公景晦以文無害為尚書刑部郎中以訕為道
州刺史居郡大理至於無事清機羨益盡付山水一旦

以書來誇曰吾得異境于近郊自城西門並南山俯江水有石穹然如夏屋其左右前後又如回廊曲房藻繡彫彤之象雲生日入怪狀迭發水石卉木香非人寰意其當為食霞御氣者之所遊息委蛻而去不知其幾千百年逮今得諸黃冠野夫及請而往因名其地曰含輝洞蓋詩家流所謂山水含清輝者是已吾子常以詞雄於世盍為我誌焉愚得書退而深惟若薛公者少居江湖間遊名山東探禹穴止四明句曲金華陽羨南過九

江薄匡廬以涉彭蠡天下山水之籍存乎胸中第其高
下銖兩不失及是而口喏不能名顧謂竒信矣若江華
者九疑三湘之佳麗地也前此二千石御史中執法河
南元次山諫大夫北平陽亢宗司刑大夫東平呂和叔
皆碩人也考槃招隱之致恒汲汲然卒使諸境貴于異
日豈地愛其實有時而發耶顧謂異信矣夫物之有作
俟言而遠故述焉以書于洞陰曰

營陽鬱鬱山水第一洞有含輝遊人忘歸公也孔樂請言

其微先是斯境翳于榛薄天姿孤絕凡目所忽閱其清
光有待而發公之來思探奇翫奇爰野憩林而民悅之
既悅其至益知所嗜捫陁歷峴來適公志偶得奇絕聿
來告公駕言從之谷岸溟濛有石如門又如垣墉蓂蔓
交木似綸似組乃芟乃治乃可布武伸脰掉臂空洞無
阻左右回環儼若廊廡飛泉出竇練鰐花吐觸石吹沙
珮搖絃撫側逕黃緣豁然見天有石如堂度之五筵東
西二門與日明昏興者如室宣者如軒因其高下爰構

亭榭匠生於心隨指如化開山剪木後以私屬結構暨
茨子來嬉嬉無事而就邦人不知淑清之辰休澣之時
雅步幅巾琴壺以隨前無俗人與白雲期年日盡適形
神不羈元氣顥然觀吾朶頤遵渚之鴻有時而飛石門
之下可以棲遲此谷而盈彼丘而夷維公之跡永在于
斯

吏隱亭述

元和十五年再牧于連州作吏隱亭海陽胡孺人自外

間不知藏山歷級東望恍非人寰前有四榭隔水相鮮
凝靄蒼蒼深流布懸架險通蹊有梁如蜺輕泳徐轉有
舟如翰登霞漾月若在天漢視被廣輪千畝之半翠麗
于是與世珠貫激明峭絕藿靡葱蒨炎景有宜昏旦迭
變疑昔神鼇負山而抃摧其別島置此高岸海陽之名
自元先生先生元結有銘其碣元維假符予維左遷其
間相距十五餘年封境服人其猶比肩天下山水非無
美人地偏人遠空樂魚鳥謝公開山涉月忘還豈曰無

娛伊險且艱溪山為友城池為伍却倚佛寺左聯仙府
勢拱臺殿光含廂廡窈如壺中別見天宇石堅不老水
流不腐不知何人為今為古終堅焉老終流焉竭不知
何時再融再結

傳信方述

余為連州四年江華守河東薛景晦以所著古今集驗
方十通為贈其志在於拯物予故申之以書異日景晦
復寄聲相謝且咨所以補前方之闕醫拯道貴廣庸可

以學淺為辭遂於篋中得已試者五十餘方用塞長者之問皆有所自故以傳信為目云元和十三年六月八日中山劉禹錫述

彭陽唱和集引

丞相彭陽公始由貢士以文章為羽翼怒飛于冥冥及貴為元老以篇詠佐琴壺取適乎閒譙鏘然如朱絃玉磬故名聞于世間鄙人少時亦嘗以詞藝梯而航之中途見險流落不試而胷中之氣伊鬱蜿蜒泄為章句以

遣愁沮悽然如焦桐孤竹亦名聞于世間雖窮達異趣而音英同域故相遇甚歡其會面必抒懷其離居必寄興重酬累贈體備今古好事者多傳布之今年公在并州余守吳門相去迴遠而音徽如近且有書來抵曰三川守白君編錄與吾子贈答緘縹囊以遺余白君為詞以冠其前號曰劉白集悠悠思與所賦亦盈于巾箱盍次第之以塞三川之請於是緹綴凡百有餘篇以彭陽唱和集為目勒成兩軸爾後繼賦附于左方太和七年

二月五日中山劉禹錫述

彭陽唱和集後引

貞元中予為御史彭陽公從事于太原以文章相往來
有日矣無何予受譴南遷十餘年間公登用至宰相出
為衡州方獲會面輸寫蘊積相視泫然爾後或雜賦詩
贈答編成兩軸太和五年余領吳郡公鎮太原常發函
寓書必有章句絡繹於數千里內無曠旬時八年公為
吏部尚書予牧臨汝有詩歎七年之別著其後云集卷

自此為第三未幾予轉左馮公登左揆每恨近而不見
形於詠言開成元年公鎮南梁予以太子賓客分司東
都新韻繼至率云三軸成矣二年冬忽寄一章詞調悽
切似有永訣之旨伸紙悽歎居數日果承訃書嗚呼聆
風相悅者四十年會面交歡者十九年以詩見投凡七
十九首勒成三卷以副平生之言

吳蜀集引

長慶四年余為歷陽守今丞相趙郡李公時鎮南徐州

每賦詩飛函相示且命同作爾後出處乖遠亦如隣封
凡酬唱始於江南而終於劔外故以吳蜀為目云

汝洛集引

太和八年予自姑蘇轉臨汝樂天罷三川守復以賓客
分司東都未幾有詔領馮翊辭不拜職授太子少傅分
務以遂其高時予代居左馮明年予罷郡以賓客入洛
日以章句交歡因而編之命為汝洛集

子劉子自傳

子劉子名禹錫字夢得其先漢景帝賈夫人子勝封中山王謚曰靖子孫因封為中山人也七代祖亮事北朝為冀州刺史散騎常侍遇遷都洛陽為北部都昌里人世為儒而仕墳墓在洛陽北山其後也陋不可依乃塋滎陽之檀山原田大王父已還一昭一穆如平生曾祖凱官至博州刺史祖鯉由洛陽主簿察視行馬外事歲滿轉殿中丞侍御史贈尚書祠部郎中父諱緒亦以儒學天寶末應進士遂及大亂舉族東遷以達患難因為

東諸侯所用後為浙西從仕本府就加鹽鐵副使遂轉
殿中主務于埇橋其後罷歸浙右至揚州遇疾不諱小
子承夙訓稟遺教眇然一身奉尊夫人不敢殞滅後忝
登朝或領郡蒙恩澤先府君累贈至吏部尚書先太君盧
氏由彭城縣太君贈至范陽郡太夫人初禹錫既冠舉
進士一幸而中試間歲又以文登吏部取士科授太子
校書官司閒曠得以請告奉溫清是時年少名浮於實
士林榮之及丁先尚書憂迫禮不死因成痼疾既免喪

相國揚州節度使杜公領徐泗素知遂請為掌書記捧檄入告太夫人曰吾不樂江淮間汝宜謀之於始因白丞相以請曰諾居數月而罷徐泗而河洛猶艱難遂改為揚州掌書記涉二年而道無虞前約乃行調補京兆渭南主簿明年冬擢為監察御史貞元二十一年春德宗新棄天下東宮即位時有寒雋王叔文以善奕棊得通籍博望因間隙得言及時事上大奇之如是者積久衆未知之至是起蘇州掾超拜起居舍人充翰林學士

遂陰薦丞相杜公為度支鹽鐵等使翊日叔文以本官及內職兼充副使未幾特遷戶部侍郎賜金紫貴振一時愚前已為杜丞相奏署崇陵使判官居月餘日至是改屯田員外郎判度支鹽鐵等按初叔文北海人自言猛之後有遠祖風唯東平呂溫隴西李景儉河東柳宗元以為言然三子者皆與予厚善日夕過言其能叔文實工言治道能以口辨移人既得用自春至秋其所施為人不可以為非當時上素被疾至是尤劇詔下內禪自為

太上皇後諡曰順宗東宮即皇帝位是時太上久寢疾
宰臣及用事者都不得召對宮掖事祕而建桓立順功
歸貴臣於是叔文首貶渝州後命終死宰相貶崖州予
出為連州途至荆南又貶朗州司馬居九年詔徵復授
連州自連歷夔和二郡又除主客郎中分司東都明年
追入充集賢殿學士轉蘇州刺史賜金紱移汝州兼御
史中丞又遷同州充本州防禦長春宮使後被足疾改
太子賓客分司東都又改秘書監分司一年加檢校禮

部尚書兼太子賓客行年七十有一身病之日自為銘曰
不夭不賤天之祺兮重屯累厄數之奇兮天與所長不
使施兮人或加訕心無疵兮寢於北牖盡所期兮塋近
大墓如生時兮魂無不之庸詎知兮

唐故監察御史贈尚書右僕射王公神道碑
公諱倭字真長其先葉黃帝夫聖人之後與庶姓不同
如河出崑崙潛於厚地歟焉振起奮為汪洋奔騰自天
非衆川也故自黃帝八代而生舜武王克殷求有媯之

盾滿封於陳是為胡公十三葉生完自以公子國難不
得立乃抱樂器奔齊桓公以卿禮接之下又十一葉和
以久為政陰浹于人遂有齊國三代稱王至建為秦所
滅項羽入秦封建孫安為濟北王漢興失國齊人謂之
王家因以為氏安子涓仕漢為鎮東將軍青州牧封劇
縣伯自涓至彤凡一十九代兩漢公卿牧守如家牒然
十代祖猛字景畧苻秦尚書令仇秦成霸業與孔明佐
蜀同功故時人謂之王葛史云北海劇人遂著為族望

欽定四庫全書

步軍營外冊
卷九

三

九代祖休儀曹尚書八代祖鎮惡佐命宋長安擒姚弘
至北齊五代祖昕七兵部尚書兄弟九人時號王氏九
龍於齊史有傳云高祖顓字君粹北齊著作郎燕郡太
守曾祖敬忠成州刺史大父上客高宗封嶽進士及第
歷侍御史主客兵部員外郎累遷兵右金吾衛將軍冀
州刺史靈州都督朔方道總管見職官儀及衣闕烈考
瞰宣州宣城縣令贈工部郎中娶河東裴氏乃生僕射
少而敦敏工為文始以崇文生應深謀祕策考入上第

拜監察御史天之賦予莫能兩大既揚令名而不以景
福享齡五十五塋于河南府偃師縣亳邑鄉後以子貴
累贈禮部尚書至右僕射夫人江夏李氏祔焉李門多
奇才父暄起居舍人暄子鄺門下侍郎平章事高叔祖
善蘭臺郎崇文館學士注文選行於時善子邕北海郡
太守有重名四方之士求為碑銘者傾天下故夫人於
盛宗禮範可法累贈至江夏郡夫人僕射有三子長子
早終次子處玄少嬰沈恙慕道士養生之術高尚其趣

強仕而沒積善不試後來果大焉季子彥威字子美始以五經登甲科歷太常博士祠部員外郎遷屯田郎中轉戶部司封並充禮儀使判官宏文館學士京兆少尹諫議大夫史館修撰以直諫出為河南少尹入為少府監司農卿改淄青節度使徵拜戶部侍郎判度支勢逼生患出為衛尉卿分司東都尋起為陳許節度使檢校禮部尚書充汴宋亳等州節度觀察處置等使北海縣開國子食邑五百戶娶潁川韓氏主客員外郎衢之女

國子祭酒楊頊之外孫夫人有三弟皆材無子早謝已
如禮祔塋于亳邑原僕射厚德覆露之尚書丕承之以
蚤孤銳意嚮學嘗閱詩至蓼莪篇感激流涕故其志如
刃始淬及學成立成為鴻儒入用為能臣參定儀制財
成經費起書生擁旌節今又領全師鎮上游握神符垂
三組皆嚮時感發之所激也志就而學成名聞而身達
欲報無所外榮中悲人子之孝在乎揚其先德以耀于
遠乃俾學古者書本系所自且銘于龜趺螭首云銘曰

山積而高澤積而長聖人之後必大而昌由聖與賢或為霸強建不克嗣濟北疏疆齊人德之其族稱王佐于符秦北海重光僕射之主負材而起策于萬乘擢為御史同時條對千目仰視桂林一枝拾芥相似名動海內夫豈不偉種德而牙乃生今子出入鼎貴理財統師流根之澤密印累累峻其追崇幽顯有輝孝嗣之志歎然弗怡春露秋霜感傷履之時久能慕祿豐益悲明發不寢永懷孝思攄之無窮曷若豐碑景毫之原佳城在斯

乃金石刻揭于道陞松耶栢耶有洛之湄過者必下來

觀信辭

欽定四庫全書

事類彙編
卷九

十六

劉賓客外集卷九

欽定四庫全書

劉賓客外集卷十

唐 劉禹錫 撰

墓誌祭文

故荆南節度推官董府君墓誌銘

元和七年夏四月某日前荊州部從事董府君以疾終于故府私第年若干其孤泣書前人之爵里耿光求我以銘于幽且先志也故重為之董姓出于豢龍氏至辛有而分在晉為良史在趙佐簡子為能臣項羽主盟為

翟王高皇帝舉兵漢中刼其兵衆不克其土後裔遂為隴西人凡稱事不稱名不待事而彰也始予謫於武陵人多中之賢有董生為守令客既而以士相見之禮成與之言能言墳典數旁摭百氏之學弱年嗜屬詩工奕碁用是索合於貴游多所慰中年奉浮圖說三乘用是貢誠於清賢多被辟書脫巾為崇文館校書郎再選至大理評事咸視真秩而不累其章職繫於外是也晚節尚道故投劾於幕府治扁舟浮江淹泛洞庭登熊耳訪

浮丘以探異賦枉渚以寄傲居數歲投老於南荆迷邦
縱性委和從化逮夫寢巨室也自含襁至於卜窆皆仁
人之賻焉是歲五月十二日卜塋于龍山之某崗外姻
至矣君名佺字庶中大父曰思簡位至汝南太守父承
祖歿于試守太子舍人始為君求婦于鄭之里生嗣子
夏卿既立而天今未之從其後又娶于閭氏生二子曰
周卿雲卿嫠也總裳髻首有正家之道嗚呼道愈富而
室愈貧志甚修而知甚寡士以隴西為貴將在令名與

銘曰

學待問而文藻身藝不試兮名孰聞大道甚夷兮此我
辰何生不茂兮非我春修門之達兮連岡撫撫蔓草如
蘭兮新墳若斧吁嗟董生兮於焉終古

絕編生墓表

顧彖吳郡人食力於武陵沅水上以讀易聞病且死飭
其子曰吾年十有五而受易於師積六十三年於茲未
嘗一日不吟乎繫象里中兒從吾讀其文多矣死則必

葬我于黨庠之側尚其有知且聞吾書君子曰若豕者可謂志篤于學矣因以絕編生諡之且表其墓後之讀功令者或采焉予既謫居是邦始至之日問能道古語可與言者邑子以生為對既而執贄請見之生危冠大袂闊視雅拜及門知讓侯肅而後入又肅而躋階心存聖言潤徹眉睫有野態而無苟容問其所執曰幼學易老而尤嗜問安學曰始聞於師晚熟于心自尼父兼三才絀八索繫辭焉以通微言與伏羲文王並行猶天三

辰同麗太極秦脫大患完文顯行漢之田丁京劉而東
京有馬魏鄭與荀兩王而吳有韋陸前者導源後之
洒之渢融混合百派奔奏唐興沙門一行方洩天幾以
探古人神友造物智斟人事制動也有祝變道也無方
軀之支流委輸于我其他紬繹祖述三十有餘家朱藍
之樸斲之為羽翼為鼓吹疇咨天人之際旁魄上下驚
精於擴撫匱巧於穿鑿猶制氏之於樂鏗鏘而已徐氏
之於禮善容而已然而前修之盡心也得以味腴寡芳

焉手胝於運管目矇於臨燭而氣耗於咏呻家居無訾
不能與計偕地偏且遠無有能晤語心愈苦而跡愈卑
寒膚慄腹以至於耄老微夫子之問持是安施乎他日
予造其室廬瓢簞在左汙尊在右有龜枵然有筴甚澤
余撼著指骨而訊之曰是疊疊者曾不予欺乎生攸爾
而對云古先聖人知道之妙不可博而得也故設象以
致意使有取有用取當其粗用當其精夫權衡所以揣
輕重不為捶鈎者設也尋尺所以商遠邇不為運斤者

設也龜策所以決羣疑不為知幾者設也幾存乎人是則以天時為卦體以地理為爻位外附人事以象焉內取諸身以象焉得樞於窠中迎數於象外自然之理不知其然雖欲強名措說無地彼枯莖朽殼安能與於此乎今夫揲之以至利灼之以殆盡徒與夫蚩蚩者問歉穰占熊虺起訟需食亡羊喪牛之間耳資其握粟以餬予口烏足為夫子道哉余以斯言邃於易故書之噫國有大學學有館以延顓門若生者苦形役志如是其顓

也茹經于腹湮滅糞壤壁水湯湯不聞其聲摧藏撲遶
與山木同朽豈地遠然耶彼文甲絳毛剝筋壽革嶺嶠
之華實炎溟之蜃蝦飛苞驛篚所至而貴夫豈貴邇也
哉悅者衆故也生之死在元和七年秋七月由死之日
推而上求直治生之辰得四百有七十甲子墓在征渚
西石磯上其墳可隱東望里塾尚行其志云

祭柳員外文

維元和十五年歲次庚子正月戊戌朔日孤子劉禹錫

銜哀扶力謹遣所使黃孟長具清酌庶羞之奠敬祭于
亡友柳君之靈嗚呼子厚我有一言君其聞否惟君平
昔聰明絕人今雖化去夫豈無物意君所死乃形質耳
魂氣何托聽余哀詞嗚呼痛哉嗟余不夭甫遭閔凶未
離所部三使來弔憂我哀痛諭以苦言情深禮至款密
重複期以中路更申願言途次衡陽云有柳使謂復前
約忽承訃書驚號大叫如得狂病良久問故百哀攻中
涕淚迸落魂魄震越伸紙窮竟得君遺書絕絃之音悽

愴徹骨初托遺嗣知其不孤末言歸輅從祔先域凡此
數事職在吾徒永言素交索居多遠鄂渚差近表臣分
深想其聞訃必勇於義已命所使持書徑行友道尚終
當必加厚退之承命改牧宜陽亦馳一函候於便道勒
石垂後屬于伊人安平宣英會有還使悉已如禮形於
具書嗚呼子厚此是何事朋友凋落從古所悲不圖此
言乃為君發自君失意沉伏遠郡近遇國士方伸眉頭
亦見遺草恭辭舊府志氣相感必踰常倫顧余負釁營

奉方重猶冀前路望君銘旌古之達人朋友則服今有
所厭其禮莫申朝脯臨後出就別次南望桂水哭我故
人孰云宿草此慟何極嗚呼子厚卿真死矣終我此生
無相見矣何人不達使君終否何人不老使君天死皇
天后土胡寧忍此知悲無益奈恨無已君之不聞余心
不理含酸執筆輒復中止誓使周六同於已子魄兮來
思知我深旨嗚呼哀哉尚饗

重祭柳員外文

嗚呼自君之沒行已八月每一念至忽忽猶疑今以喪
來使我臨哭安知世上真有此事既不可贖翻哀獨生
嗚呼出人之才竟無施為炯炯之氣戰于一木形與人
等今既如斯識與人殊今復何託生有高名沒為衆悲
異服同志異音同歡唯我之哭非弔非傷來與君言不
成言哭千哀萬恨寄以一聲唯識真者乃相知耳庶幾
儻聞君儻聞乎嗚呼痛哉君有遺美其事多梗桂林舊
府感激生持俾君內弟得以義勝平昔所念今則無違

旅魂克歸崔生實主幼穉甬上故人撫之敦詩退之各
展其分安平來賙禮成而歸其他赴告咸復于素一以
誠告君儻聞乎嗚呼痛哉君為已矣余為苟生何以言
別長號數聲冀乎異日展我哀誠嗚呼痛哉尚饗

為鄂州李大夫祭柳員外文

嗚呼至人以在生為傳舍以軒冕為儻來達於理者未
嘗惑此昔余與君論之詳熟孔氏四科罕能相備惟公
特立秀出幾於全器才之何豐運之何否大川未濟乃

失巨艦長途始半而喪良驥搢紳之倫孰不墮淚昔者
與君交臂相傳一言一笑未始有極馳聲日下驚名天
衢射策差池高科齊驅攜手書殿分曹藍曲心志諧同
追歡相續或秋月銜觴或春日馳轂旬服載暮同升憲
府察視之列斯焉接武君遷外郎予侍內闈出處雖間
音塵不虧勢變時移遭罹多故中復賜環上京良遇曾
不踰月君又即路遠持郡符柳江之壩居陋行道疲人
歌焉予來夏口忽復三年離索則久音貺屢傳篋盈草

隸架滿文篇鍾索繼美班揚差肩賈誼賦鵬屈原問天
自古有死奚論後先痛君未老美志莫宣遭回世路奄
忽下泉嗚呼哀哉令妻早謝穉子四歲天喪斯文而君
永逝翩翩丹旌來自遐裔聞君旅櫬既及岳陽寢門一
慟貫裂衷腸執紼禮乖出疆路阻故人奠觴莫克親舉
馳神假夢冀獲寤語平生密懷願君遣吐遺孤之才與
不才敢同已子之相許嗚呼哀哉尚饗

祭韓吏部文

高山無窮太華削成人文無窮夫子挺生典訓為徒百
家抗行當時勅者皆出其下古人中求為敵蓋寡貞元
之中帝鼓薰琴奕奕金馬文章如林君自幽谷升于高
岑鸞鳳一鳴蜩蟬革音手持文柄高視寰海權衡低昂
瞻我所在三十餘年聲名塞天公鼎侯碑志隧表阡一
字之價輦金如山權豪來侮人虎我胤然諾洞開人金
我灰親親尚舊丹其壽考天人之學可與論道二者不
至至者其誰豈天與人好惡背馳昔遇夫子聰明勇奮

常操利刃開我混沌子長在筆子長在論持矛舉楫卒
不能困時惟子厚竄言其間贊詞愉愉辨道顏顏磅礴
上下義農以還會於有極服之言詮胡合我而長逝徒
泣涕而漣漣吁嗟乎岐山威鳳不復鳴華亭別鶴中夜
驚畏簡書兮拘印綬思臨慟兮志莫就生芻一束酒一
盃故人故人歆此來

祭興元李司空文

維大和四年月日禮部郎中集賢殿直學士劉禹錫謹

以清酌之奠敬祭於故相國山南西道節度使贈司空
李公之靈嗚呼龜靈而刳龍知而屠古今同之天不可
呼公之挺生德與位并如瞻日月豈贊其明何以致之
姑話平生追懷周旋彌四十年射策校文接武聯翩旬
服同邑明庭比肩公乘迅颿凌厲非烟愚觸駭機迸落
深泉一持化權一謫海壖本同末異如矢別弦雲龍井
蛙勢不相見二紀迴泊一朝會面公為故相愚似悲翁
契闊相遇淒涼萬重復以郎吏交歡上公披襟道舊劇

談小酒清洛泛舟鑿龍攜手公入西關愚亦徵還削去
苛禮招邀清閒廣陌聯鑣高臺看山尋春適野醉舞花
間忽復登壇總戎于外子午危棧巴梁古岸夷風愴寧
獫俗陷害陰謀密備克黨千輩如噬羣犬以逼騶虞如
縱炎火以焚瑾瑜時耶命耶不慮不圖物理神道安知
有無嗚呼痛哉玄天甚高上訴何時長夜無曉斯焉永
歸風淒日昏鼓咽簫悲沉埋玉樹誰不霑衣平生故人
零落已稀委花而盡然猶怨咨如何國楨有此遭罹挺

災賦命孰主張之有肴在筵有酒盈卮神其來歆已矣
長辭尚饗

代裴相祭李司空文

四年月日特進守司空兼門下侍郎平章事裴度謹以
清酌少牢之奠敬祭于故相國魏郡公之靈嗚呼玉貞
而折不能瓦合鸞鍛而姜不同雞羣生兮若浮守道不
屈惟公之生福自維嵩金石高韻珪璋德容元和之初
左右憲宗以才視草以望登庸振起直聲激揚清風實

有正氣號為名公名成身退猶係人望入為羽儀出領
藩方既師百辟又副丞相道冠搢紳事參翼亮某與公
遊四十餘年風期合契祿位相先某忝司言公持化權
應同宮徵馥若蘭荃猥以姓名稱於上前發迹從微芳
徽獲宣某為免相待罪梁山公拜右揆來從東川極其
歡娛著在詩篇某忝三入公東亦還里門相適賓閣常
閒退朝休澣道舊開顏嗟乎山川間之忽在旦夕豈意
倉卒遂成今昔衣冠喪氣風物含戚強魂訴天冤血成

碧嗚呼哀哉某在病中訃書始至無力以哭不言垂淚
今聞被輅首路而歸隱几臨風其心孔悲嘉肴百籩旨
酒一卮寄此情素神其來思嗚呼哀哉

代諸郎中祭王相國文

維大和四年月日某官等敬祭于故相國贈太尉太原
王公之靈嗚呼天以和氣鍾於貴人含光不曜照物如
春發自貢士驟為廷臣鴻鴈聯行其凌青雲既操利權
兼秉國鈞食祿甚厚奉身如貧井絡之隅益部為大斗

牛之下揚州繁會受社臨戎油幢曲蓋印綬重疊恩華
滂霈簿領如山處之若閒摧筦之權往而復還炎炎暉
暉出入二紀未曾傷神屢有薦士急難友弟謹厚訓子
顏間熙熙不形愠喜處已無咎得君如此若木方高商
飆歛起三台之氣變現在時五福之來盛衰有期曉下
黃閣車騎威遲夕歸華堂言笑嘻怡詰朝愀然有志求
醫未撤琴瑟俄懸素旂宸衷震悼朝右悽悲詔下褒崇
恩殊等夷靈輅既駕真宅將歸笳簫咽而復揚風日慘

而無輝玄亮等或早挹清塵或晚承泛愛昔修禮于門
聞今纏悲于祖載幽顯雖異音徽未昧神之格思歆此
誠酌尚饗

祭福建桂尚書文

維大和六年月日蘇州刺史劉禹錫謹以清酌之奠敬
祭于故福建團練使桂公之靈鵬化鵬征擘波冲天士
逢其時捨笈乘軒始識尚書貞元季年詣我南省袖文
一編便坐接語其容溫然星歲未幾鄙夫南遷滯留江

湘魚鳥周旋尚書遇知變化如蟬東憲朝右剖符江壖
交趾化行容州績宣凡曰循吏莫居我先太和之初再
遂良覲分務東洛門里同陌余復郎位公為賓客蔚然
貴臣綬紫鬚白俄俱西還列于清班來訪書殿登樓看
山見領八屯循街九關賀遷閩越紅旆雙殷克有淑聲
搢紳之間惇嫠鼓舞强悍低跼延平古津峭壁孱顏豈
意龍劍沉晶不還復魄侯堂歸舟建浦雙表何在虎丘
之下恭承嘉命來牧吾土言念昔遊忽成千古哀哀孝

嗣率禮無違言奉几席歸乎洛師敬陳奠筵泣對靈帷
平生不忘歆此一卮嗚呼哀哉


祭虢州楊庶子文

維太和六年月日蘇州刺史劉禹錫謹遣軍吏某乙具
少牢清酌之奠敬祭于故虢州楊公之靈嗚呼利劍多
缺真玉喜折俊人不壽為氣所齧子之少孤率性自然
早有名字結交世賢席勢馳聲龍秋鳥公試文再售毛
翮愈鮮歷佐侯藩拾遺君前伏閣論事氣奪內權克揚

直聲不愠左遷一斥于外君門邈然五剖竹符皆有聲
績南湘潛化巴人啞啞比陽布和戰地盡闢壽春武斷
姦吏奪魄榮波砥平士庶同適朝典陟明俾臨本州錫
以貴綬腰金晝遊輿疾而來風烟為愁靜治三載卧分
主憂直氣潛銷顏几不留九天難問萬化同休嗚呼惜
哉與君交歡已過三紀維私之愛與衆無比乃命長嗣
為君半子誰無外姻君實知己昔與君遊俱為壯年怒
人言命笑人言天閱事未多信書太堅方階尺木已墜

九泉誦年易深潛病難痊不見南楚方知北軒嗚呼嗟
哉見幾不早追悔已晚猶希苟老容或宣轉以閒相期
以晦相勉一丘可樂萬累皆遣翫圖散秩婆娑京輦天
命不長願言莫展嗚呼痛哉君卧弘農余來姑蘇飛書
相約言念鼎湖我車載脂為子疾驅入境閒寂唯逢素
書發函驚視翰不自濡相去一舍豈無肩輿君為病嬰
我為吏拘兩不如意嗟哉命夫君今往矣無復可道我
今泛然一委玄造平生親友零落太早無望拔茅盡悲

宿草到郡決辰君不起聞寢門一慟心哀如焚彭彭輜
車來葬洛濱敬修賻禮泣送行人萬夫之羞薦君明魂
三赤之板寫予哀文淒涼山河慘淡風雲已矣長別嗟
我楊君



劉賓客外集卷十